

潛齋醫學叢書

言醫選評  
願體醫詁  
徐氏醫砭

陽

裴坤期先生原著

楊素園先生鑒定

言醫選評

上海李鍾珏平書手校

中華民國元年三月印行

潛齋醫學

叢書

潛齋醫學叢書序

昔天隨子著笠澤叢書凡四卷今潛齋著醫學叢書凡八種猶有未刊可謂夥矣雖然學貴博尤貴精潛齋家故貧少失怙晦跡於醫從父志也名其齋曰潛勵己志也嘗以爲醫通天地人非綜覽羣書夜以繼日曷竟其功於是燈燃帳內頂爲之墨其刻苦蓋如此故出而瘳人疾病則必竭其心思殫其才力一如平日之用功焉然而方圓隨施不拘一家雖淺夫之邇言亦必虛中以聽儕輩質疑問難則又知無不言於以歟學之無所不貫故能決之而無所不注也聞道以來活人不可以數計而奇險之證奏效尤出人意表其用藥不尚珍貴以糜人財苟能中病雖尋常耳目前之物信手拈來皆成妙用嗚呼不亦精義入神乎哉然不矜其術不恃其奇唯義所適殆所謂道行千里不名一錢者則又其品之不可及歟茲以所評纂之書論斷之語與夫前賢著述訂之而不沒人善良友采輯存之而非居己功凡書八種彙爲一帙余既有序之矣復屬爲總序可無一言以約略其旨哉

夫工於著述者往往泥古而未知通變臨證每致齟齬得行其道者酬應既繁而不遑著述苦無傳書惟潛齋素無嗜好視疾之外輒事討究樂此不疲故時有妙悟觀其立言既無迂曲謬悠之論亦無怪僻膚淺之談抉理雖深準情彌近即不知醫者讀之亦能領解焉且潛齋年尙未艾其所得已如是由斯以往余又惡能測其涯涘耶後有作者沿流溯源亦尙窺見其苦心孤詣之學而於余言庶幾其不虛也夫

咸豐甲寅一陽來復之日愚弟仁和趙夢齡謹拜撰

潛齋醫學叢書序

唐有陸忠宣宋有范文正爲兩朝良相皆通醫理蓋治國活人理原一貫故有不爲良相爲良醫之言醫道顧不重哉自漢長沙集列聖之大成察微辨證立方著書博大精微統系悠遠後之人沾溉不盡洵萬世師表也名賢繼起沿流討源漸分鴻緒以至各立專科代有高明不無參互迨劉張李朱皆卓然大家而其間論證立方或方隅異宜或貴賤殊體在當時理疾並有奇驗後人憑古書而診今病則頗有不合機宜者此即郭玉所謂神存於心手之際可得解而不可得言醫理微妙固如是也豈可以臆度妄論古人之偏見哉然而醫門之書有日增無日減汗牛充棟收不勝收其間容有僻解偏見誤人不少是宜亟爲釐正熱心苦口振贖警聾不免大聲疾呼矣 聖朝之初吳中葉氏香巖統率正宗獨見其大富有成書而發揮一種尤爲深切痛快徐氏洄溪學窮萬卷守正獨眞力剗流弊著書六種兩先生述作具在信暗室之燈也今吾潛齋先生天分絕人具慈良之性秉

明妙之心而於古人之書固不貫注披往籍則識見獨超理時證則靈機畢集其  
於診脈辨證洞徹病原而因證發明類多新義迥出前人意表者至於溫暑客氣  
尤爲剖晰精詳於古人混淆牽合之處無不指摘分明如鄒嶧之拒楊墨昌黎之  
闢佛老其有功來學顧不偉歟前者同好諸君子采刊醫案久已風行海內今年  
春復將先生手輯之書彙集八種續付剞氏顏曰潛齋醫學叢書皆獨得精華嚴  
芟枝葉其中靈通微妙時見一斑具不可思議之妙用真可謂不恨我不見古人  
恨古人不見我者綱舊讀先生書而嚮往數年深慚學識固陋不敢妄贊一詞然  
仰慕之私自不能已既後患腰足痺痛遷延日久疾幾成痼得先生探源竟委之  
治而厥疾頓起其案已列三編茲得窺全豹倍益服膺因識數行以銘高厚竊恐  
輕塵補嶽來不自量之謹耳

咸豐四年甲寅仲冬秀水辱教弟呂大綱慎盦氏拜手書

重刊潛齋醫學叢書序

天下謀生之術多矣未有以殺人爲生計者有之曰醫夫醫之道生人之道也曷以殺人曰得其道則生人失其道則殺人夫醫之道廣矣大矣高矣深矣業此者以至廣之見至大之識至高之品至深之學受人性命存亡之寄猶懼弗勝焉若乃見狹而狃於一偏識小而拘於一墟品卑而惟利是圖學淺而以欺爲術是安得不殺人耶今者歐風西入和學東來向之以殺人爲生計者懼矣然而徒懼無益也吾數千年一脉相傳之道具在反而求之將乞靈於古籍問塗於已經擴其見而宏其識敦其品而蓄其學所以保全個人生計者在此所以保存中土醫道者在此往見武林王孟英先生所輯潛齋醫學叢書八種以爲道博而返之於約理微而出之以顯可爲業醫者補習之助

潛齋醫學叢書

惜其書罕覲爰於戎馬倥偬之際抽閒校勘付之手民以餉世之習醫者苟研求而有得焉將免殺人之惡名而爲生人之仁術豈不懿歟

中華民國元年五月上海李鍾珏序

言醫選評小引

言醫一書 國初時海甯裴氏兆期所著康熙間錢塘高士宗醫學真傳曾論及之則彼時必有刊本迨後湮沒失傳故道光間震澤吳子晉於三家醫案例言後有續刊此書之語惜子晉尋逝竟未重鐫往歲定州楊素園明府囑購醫林遺帙余浼人往蘇蒐訪得其原稿讀之雖辨香醫貫而識見實超出於趙氏更有先言余之所欲言者遂忘固陋選而評之郵質楊侯極蒙許可且命授梓以公於世云咸豐元年春王正月邑人王士雄書於重慶堂

言醫

海甯裴一中兆期著

定州楊照藜素園閱定  
後學王士雄孟英評選

吾快讀裴子之書而異之也。學不貫今古。識不通天人。才不近仙。心不近佛者。寃耕田織布取衣食耳。斷不可作醫以誤世。醫固神聖之業。非後生讀書未成。生計未就。擇術而居之具也。是必慧有夙因。念有專習。窮致天人之理。精思竭慮。於古今之書。而後可言醫。每見庸工治病。十失其五。良工治病。亦十失其一。由一以循累之誤。亦未忍言也。卽能窮致天人之理。精思竭慮。古今之書。而病伏於內。醫測於外。病以奇伏。醫以意測。幸而得。則竟得矣。或偶不得。則不爲二。豎所笑者無之。此扁鵲所以需上池之水。而思邈所以藉龍宮之方也。夫上池之水不易得。龍宮之方不再傳。則惟窮理讀書。以學識參造化之權。而後可。若裴子者。斯其人矣。若裴子者。固數百年所未出之人也。古今之有學識者。當首

推張戴人及劉河間能與病血戰而不奉表稱臣於病。第未免過甚耳。其餘諸家立法非不善。實爲鄉愿逋逃之藪。故謂醫有成心不可也。謂醫有成理尤不可也。無成理而有或效。醫信難言哉。裴子之言曰。以生死易視者易之。固數百年所未出之言也。獨謂裴子學貫今古。識通天人。才則仙而心則佛。信也非譽矣。誦其言皆軒岐所欲言而深悔未及言。亦諸大家所欲言而格格不能言。豈帝憫枉札之禍。助其神智而授之使言歟。推此而失者可得難者可易。而謂醫無成理尤不可也。余以多病學醫。日爲醫而醫日下。初似可游刃。邇皆茫然。抑鬱焦思。徒廢寢食。行將耕田織布棄醫而去。以求無誤於世。今秋得晤个亭先生。極口兆期裴子學識。且示以所著書。余向慕裴子名而不圖其貫通至此也。一再讀之。豁乎快有所獲。裴子教我矣。何時共晨夕而相諮詢。究竟此神聖之業哉。順治十四年丁酉中秋日。友弟趙善鳴聲伯父序。

醫之道難言矣。余何人斯。敢僭言也。惟是醫教衰而醫日流於弊。古聖賢仁壽之

傳幾歸淪沒。遂不自禁其婆心之熱。率蠭見而僭言之也。知我罪我。其在茲乎。  
人之一身。無非病也。亦無非藥。泥金石草木鳥獸蟲魚爲藥。偏矣。亦後矣。飢飽待  
時。飲食藥也。寒溫適所。衣服藥也。動靜有常。起居藥也。色不視邪。則目明。聲不聽  
淫。則耳聰。口無莠言。行無顛步。則口體正。均藥也。使有人焉。知填精而不知寡欲。  
知養氣而不知守默。知保神而不知絕慮。亦焉往而得藥。素問醫之六經也。但言  
順四時。少嗜欲。節飲食。不爲邪氣凌犯。初未嘗以藥言。其五志爲病者。卽以五志  
爲藥。如曰悲勝怒。病怒者。悽愴哀苦以感之。喜勝悲。病悲者。謔浪佚豫以娛之。恐  
勝喜。病喜者。迫遽危亡以怖之。怒勝思。病思者。汚辱欺妄以激之。思勝恐。病恐者。  
沉疑搜剔以緩之。至如逸可治。勞靜可治。躁處陰以避暑。就燠以避寒。凡此之類。  
皆非熱非寒。非酸非苦。無煩採製。不費咬咀。隨在而得之。之聖藥。遠逾草根木皮  
萬萬也。則請爲尊生者揭未病之藥。

慎起居。節飲食。則外感不能侵。若情志所傷。不可徒以藥治之。張戴人深知此

義觀其治案可以爲萬世法。蓋草木之功。但可以祛六淫之邪也。

素問曰不能治其虛何問其餘夫不曰補其虛而曰治其虛大有深義。治字補字難易大不相侔。補其虛者祇有虛而別無邪氣夾虛中。譬猶弱國時也。治其虛者不足之中兼有餘之證。譬國勢強弱相半時也。此時而欲補之。則邪未衰。欲瀉之。則氣已敗。勢介兩難。必隨時取中於其間。或先攻後補。或先補後攻。或因攻爲補。或借補爲攻。雖攻而正不戕。雖補而邪不熾。方可謂之治其虛。謂之能治其虛耳。於此不能。其餘何可復問。旨哉。須知治之一字。有無限苦心。無窮妙用。在與虛則補之之一字。大有間。世都忽而不察。特註明之。

分別治虛補虛之異。有裨後學不少。

醫何以仁術稱。仁卽天之理。生之原。通物我於無間也。醫以活人爲心。視人之病。猶己之病。凡有求治。當不啻救焚拯溺。風雨寒暑勿避。遠近晨夜勿拘。貴賤貧富好惡親疏勿問。卽其病不可治。亦須竭心力以圖萬一之可生。是則此心便可徹。

天地統萬物。大公無我而幾於聖矣。不如是安得謂之醫而以仁術稱。

藹然仁者之言。業是術者當書座右。

醫者常須愛養自家精力。精力不足則倦。倦生厭。厭生躁。厭躁相乘。則審脈辨證處方。皆苟率而無誠意矣。思欲救死全生。庸可期乎。今之醫者。鮮克不以奔競爲專務。徒勞苦而不自知大戒也。

不但奔競當戒。尤宜屏除嗜好。蓋嗜欲紛。則靈機塞也。

醫之看病。與文家之相題無二。病題也。脈題之旨也。藥則詞章也。方法局與勢也。善爲治者。脈證既詳。當思所以治之之法。而隨因法以立方。藥不過如卑賤之職。唯吾方法驅使耳。不思者。竟以草木爲拘。見頭痛便用川芎。見腳痛便加牛膝。救頭救腳。茫乎其無統宗。雖藥品精良。亦何能中病之窺會哉。是猶文家不以題旨局勢爲先。而僅修詞章之末。縱言言錦繡。字字琳瑯。與本題將千里隔矣。何足貴。證不辨清。脈亦無憑。故博學審問。慎思明辨。篤行五者。醫家不可缺一也。

胃爲水穀之海。脾爲生化之源。生化旺則氣血清和。諸病屏息。生化衰則氣血虧損。百疾交侵。非細故也。惟東垣先生深得此旨。闡發脾胃元氣之妙。可謂呼聲震啟。噴光矣。世之醫者。徒執病形。不推病本。脾胃之義置而勿講。如脾虛氣短似痰喘耳。泥爲肺熱痰壅。瀉以石膏蘇子。脾虛發熱似外感耳。認作風寒外束。表以羌活麻黃。脾虛下陷變爲後重裏急。猶謂滯積不行。可以硝黃枳朴。脾虛不運變爲水脹中滿。猶謂宿食未化。導以巴豆牽牛。產後感風。飲食停滯而嘔吐脹悶。誤擬敗血攻心。恣餌桃仁四物。勞瘵脾虛。飲食減少而惡心溏瀉。尙執滋陰降火。偏需知檗二冬。投之不愈。更恣投之。脾胃轉傷而疾轉篤。技窮莫措。歸命于數。時弊如斯。曷可勝計。無他。未明主氣之說故也。主氣實而攻之。則病易愈。主氣虛而攻之。則病反加。非藥不能治病也。主氣不行。藥力也。況當世之人氣稟寢薄。兼多沉湎于酒。耽縱于色。汲汲沽名。皇皇求利。又復傷于勞思者。更不少也。司命者其可不亟講于斯。